

Oqaluuserisassanut nassuiaat

(Inatsisartut Siulittaasuat)

Ukiakkut ataatsimiinnermut maani februaarip qaammataani naammassiniagassatsinnut tikilluaritsi.

Ulloq aallartissavarput erinarsoqatigiit Kalutit ilagalugit. Taakku erinarsuutininik marlunnik erinarsorfigissavaatigut, takannalu ilaasortat erinarsoqataanissaannut.

Erinarsoqatigiit qinnuigaakka ataatsimiittarfitsinnut iseqqullugit, maangalu ataatsimiinnermik aqutsisup saavanut inisseqqullugit. Erinarsoqatigiit erinarsuutininik marlunnik erinarsornerini nikorfanissarput siunnersuutigaara.

(erinarsoqatigiinnut qujavugut)

Maannalu UKA24 nangeqqissavarput immikkoortut UKA24-mi unillatsianninnitsinni suliarissallugit angumerinnngitsuukkagut inissaqartinniarlugit ataatsimiiffissaareersut saniatigut ullumi februaarip ulluisa pingajuanni ataatsimiiffissatut pilersinneqarsimasumi.

Ullumi ataatsimiinneq taamaalilluni immikkoortut tamaasa naammassitserlugit ingerlassaaq, unnukkulli arfineq-pingasut qaangernagit.

Ullut ataatsimiiffiusut ullaakkut qulinut aallartittassapput ualikkullu tallimatut tungaannut ingerlasassallutik. Immikkoortut ullormi oqaluuserineqarfissaminni naammassillugit suliarineqanngitsoortut ullormut ataatsimiiffiusussamut tullermut ingerlateqqinneqartassapput.

Naalakkersuisut partiit naatsorsuutaat pillugit inatsisissatut siunnersuummik saqqummiussaqaqqullugit siulittaasoqarfik qinnuigisimavaat.

Qinnuteqaat tamanna siulittaasoqarfiup akuersaarsimavaa oqaluuserisassanullu immikkoortumik nutaamik ilanngussisoqarnissaa akuerisimallugu.

Immikkoortoq nutaaq oqaluuserisassanut ilanngunneqartoq immikkoortutut 165-imik normoqarpoq qulequtaralugulu:

Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaata allanngortinneqarneranik Inatsisartut inatsisaat

(Naalakkersuinikkut sulineranut inunnit inatsisilerinikkullu inuttut isigineqarsinnaasunit tapiissutinik pissarsisarneq pillugu paasissutissiisussaataanerup sakkortusineqarnera, kinaassutsimik isertuussilluni nunanillu allanit tapiissutinik tunineqartarnermik inerteqquteqarneq, tapiissutit annertussusiinut killigititat)

(Inatsisartut Siulittaasuat)

Immikkoortoq 165 aqagu februaarip ulluisa sisamaanni pingasoriagassanngorlugu oqaluuserisassanngortinneqarpoq.

UKA24-p ingerlanerani sinniisussaareerlutik ilaasortaajunnaartunut, Lars Salik Henningsen Kielsenimut Inuit Ataqatigiinneersumut Hartmann Heilmannimullu Naleqqameersumut, aamma qujavugut.

Taasisarnerit pillugit uku akornanni isumaqatigiissuteqartoqarpoq: